

佛教正覺同修會 大悲懺法會啟建疏文

離苦得解脫 大悲觀世音 得大自在力 無畏施眾生。
妙音觀世音 梵音海潮音 救世悉安寧 出世獲常住。

一心歸命 南無大悲慈父廣大靈感 觀世音菩薩！仰惟 大士從聞思修入三摩地，得二隨順、四不思議、十四無畏、十九說法、七難二求、三十二應無量功德。興大威力 發大誓願 同流九界 六道四生 生死趣中 興百千萬億無量恒河沙劫數善行方便 救度拔濟一切眾生 無有休息。我今哀求 必賜加被，所有意文 佛前恭宣，
大圓鏡中俯垂朗鑑。

伏念弟子

無始劫以來不識自心如來，以虛妄我為真實我

顛倒分別 起念造惡 苦果不息。弟子雖以夙時微善 獲遇真乘、得聞正法 仰奉 大士教誨「大慈悲心是 平等心是 無為心是 無染著心是 空觀心是 恭敬心是 卑下心是 無雜亂心是 無見取心是 無上菩提心是」 以真實理 為弟子開解進趣，弟子雖復於平日行中，憶佛念佛，勤加用功、廣修福慧，未敢稍怠，無奈習染偏強，心常執著五陰假我，二毒流火時刻現行，嘆己德薄，淨功莫剋。又慮弟子過去無始劫來，與諸怨親，以同入三界生死苦海之故，恩怨報償、業業相牽，長劫輪轉、無有出期。

今弟子仰仗大悲神咒佛法勝會、承 大士力，至心發露懺悔過去現在諸惡，已作之罪不敢覆藏，未作之業皆不令造，如是清淨身三業、口四過、意三毒，遠離惡見邪行，化解自他怨讎，一體出纏。以真實心如來藏妙法，勤淨自心，永離能所之執見，斷除五陰之妄想。

惟願 大士 天耳聞聲 悲心救苦 憐愍加被。開我迷雲 通曉義理，參禪學道 悟無生忍，世世生生，行菩薩道，得大辯才、大智慧、大壽命、大安樂。一切會眾，無諸魔障，僧團和敬，師道常彰，正覺寺造立順遂，開弘聖教，法界眾生，同圓種智。

稽首 十方諸佛、觀音大士、諸聖尊前 弟子一心五體投地，
伏願 大士證盟攝受。

佛曆 二五六八年 公元 二〇二四年 歲次 甲辰 農曆 月 日
佛教正覺同修會共修弟子 及所有與會大眾

於臺北正覺講堂 拜伏具呈